

# ხონის მუნიციპალიტეტის საკრებულოს

დადგენილება №15

2011 წლის 30 მარტი

ქ. ხონი

## ხონის მუნიციპალიტეტის ტერიტორიაზე ადგილობრივი გადასახადების შემოღებისა და მისი განაკვეთების განსაზღვრის შესახებ

„ადგილობრივი თვითმმართველობის შესახებ“ საქართველოს ორგანული კანონის 22-ე მუხლის პირველი პუნქტის „მ“ ქვეპუნქტის, საქართველოს საგადასახადო კოდექსის მე-7 მუხლის პირველი ნაწილის, 29-ე თავის, „ნორმატიული აქტების შესახებ“ საქართველოს კანონის 25-ე მუხლის პირველი პუნქტისა და „სასოფლო-სამეურნეო დანიშნულების მიწაზე ქონების გადასახადის წლიური საბაზისო განაკვეთის დამტკიცების თაობაზე“ საქართველოს მთავრობის 2010 წლის 23 დეკემბრის №394 დადგენილების შესაბამისად:

ხონის მუნიციპალიტეტის საკრებულომ დაადგინა:

### მუხლი 1.

შემოღებულ იქნეს ხონის მუნიციპალიტეტის ტერიტორიაზე ადგილობრივი (ქონების) გადასახადი და მისი განაკვეთები განისაზღვროს დანართის შესაბამისად.

### მუხლი 2.

ძალადაკარგულად გამოცხადდეს „ხონის მუნიციპალიტეტში ადგილობრივი გადასახადების შემოღების შესახებ“ ხონის მუნიციპალიტეტის საკრებულოს 2007 წლის 16 მაისის №38 დადგენილების მე-2 მუხლის 1-2-3 და მე-6 პუნქტები.

### მუხლი 3.

დადგენილება ძალაში შევიდეს გამოქვეყნებისთანავე და მისი მოქმედება გავრცელდეს 2011 წლის 1 იანვრიდან წარმოშობილ საგადასახადო ურთიერთობაზე.

საკრებულოს თავმჯდომარე

გ. გელენიძე

დანართი № 1

## ხონის მუნიციპალიტეტის ტერიტორიაზე ადგილობრივი (ქონების) გადასახადის განაკვეთები

### მუხლი 1

ხონის მუნიციპალიტეტის ტერიტორიაზე ადგილობრივი (ქონების) გადასახადის გადამხდელი და დაბეგვრის ობიექტი განსაზღვრულია საქართველოს საგადასახადო კოდექსის 201-ე მუხლის შესაბამისად.

### მუხლი 2

საწარმოსთვის/ორგანიზაციისთვის ქონების გადასახადის წლიური განაკვეთია დასაბეგრი ქონების ღირებულების 1 %. ამ მუხლის მიზნებისათვის დასაბეგრი ქონების ღირებულება არის საშუალო წლიური საბალანსო ნარჩენი ღირებულება, რომელიც ქვემოთ ჩამოთვლილ შემთხვევებში უნდა გაიზარდოს:

- ა) 2000 წლამდე მიღებულ აქტივებზე – 3-ჯერ;
- ბ) 2000 წლიდან 2004 წლამდე მიღებულ აქტივებზე – 2-ჯერ;
- გ) 2004 წლის მიღებულ აქტივებზე – 1,5-ჯერ;

დ) იმ აქტივებზე, რომელთა მიღების შესახებ ინფორმაცია არ არსებობს – 3-ჯერ.

### **მუხლი 3**

საწარმოსთვის /ორგანიზაციისთვის ლიზინგით გაცემულ დასაბეგრ ქონებაზე გადასახადის წლიური განაკვეთია დასაბეგრი ქონების საშუალო წლიური საბალანსო ნარჩენი ღირებულების 1%.

### **მუხლი 4**

ფიზიკური პირის დასაბეგრ ქონებაზე გადასახადის წლიური განაკვეთი დიფერენცირებულია გადასახადის გადამხდელის ოჯახის მიერ საგადასახადო წლის განმავლობაში მიღებული შემოსავლების მიხედვით და განისაზღვრება შემდეგი ოდენობით:

ა) 100 000 ლარამდე შემოსავლის მქონე ოჯახებისათვის საგადასახადო პერიოდის ბოლოსათვის დასაბეგრი ქონების საბაზრო ღირებულების 0,2 %;

ბ) 100 000 ლარის და მეტი შემოსავლის მქონე ოჯახებისათვის საგადასახადო პერიოდის ბოლოსათვის დასაბეგრი ქონების საბაზრო ღირებულების 0,8%.

### **მუხლი 5**

1. სასოფლო-სამეურნეო დანიშნულების მიწაზე ქონების გადასახადის წლიური განაკვეთია:

ა) სახნავი და მრავალწლიანი ნარგავებით დაკავებულ 1 ჰა მიწაზე – 59 ლარი.

ბ) ბუნებრივი სათიბებისა და საძოვრების 1 ჰექტარზე:

ბ.ა) სათიბებზე, მათ შორის, გაკულტურებული – 16 ლარი;

ბ.ბ) საძოვრებზე მათ შორის გაკულტურებული – 10 ლარი.

2. ყოფილი საკოლმეურნეო და საბჭოთა მეურნეობების ტყეების ერთ ჰექტარ მიწაზე ქონების გადასახადის წლიური განაკვეთი განისაზღვროს 20 ლარით.

3. ბუნებრივი რესურსები მოსარგებლე პირისათვის შესაბამისი ლიცენზიის გაცემის საფუძველზე გამოყოფილი მიწების 1 ჰა-ზე გადასახადის წლიური განაკვეთი განისაზღვროს 3 ლარით.

### **მუხლი 6**

ხონის მუნიციპალიტეტის ტერიტორიაზე არასასოფლო-სამეურნეო დანიშნულების მიწის 1 მ<sup>2</sup> -ზე ქონების გადასახადის ტერიტორიული კოეფიციენტია:

1. ხონის მუნიციპალიტეტის ადმინისტრაციული ცენტრისათვის (ქალაქ ხონის ტერიტორიაზე – 0,5).

2. ხონის მუნიციპალიტეტის შემადგენლობაში შემავალი სოფლების და თემების ტერიტორიაზე – 0,25.

### **მუხლი 7**

არასასოფლო-სამეურნეო დანიშნულების მიწის 1 მ<sup>2</sup> დასაბეგრი ქონების წლიური გადასახადია:

1. ქ. ხონის ტერიტორიაზე – 0,12 ლარი.

2. ხონის მუნიციპალიტეტის შემადგენლობაში შემავალი სოფლებისა და თემების ტერიტორიაზე – 0,06 ლარი.

### **მუხლი 8**

არასასოფლო-სამეურნეო დანიშნულების მიწის საბაზისო განაკვეთი 1 მ<sup>2</sup>-ზე შეადგენს 0,24-ს.

### **მუხლი 9**

ქონების გადასახადი არ ვრცელდება ხონის მუნიციპალიტეტის ტერიტორიაზე მდებარე საკარმიდამო, საბაღე, საბოსტნე და სააგარაკო სასოფლო სამეურნეო, დანიშნულების, აგრეთვე მრავალბინიან საცხოვრებელ კორპუსებზე, საცხოვრებელ სახლებსა და ავტოფარეხებზე მიმაგრებულ მიწის ნაკვეთებზე.

## **მუხლი 10**

ეს დადგენილება ამოქმედდეს გამოქვეყნებისთანავე.